

Tinjisits uaspits, vruts sh-duruts Armânji,

Ghini vinitu Muscopuli, la aestâ protâ Adunari a Armânjiloru / Makedonarmânjiloru, di iutsido.

Di partea a Consillui Armânjiloru / Makedonarmânjiloru vâ hâristusimu a vauâ, tuts cari vinitu aoa, trâ vrearea tsi u spusitu, trâ copuslu sh-lunga cali tsi u featsitu.

Aestâ Adunari fu andreaptâ di CMA, andrupâtu cu multâ vreari shi shteari di pareili di tiniri ditu craturli iu Armânjilji bâneadzâ. Trâ aestu andrupâmintu voiu s-hâristusescu, tu numa a Biroului di Cumândâseari a CMA, a tutâloru tinirloru tsi-agiutarâ sh-ma multu a pareiljei di vârnâ 40 di tiniri tsi aoa sh-unâ stâmânâ agiumsirâ Curceaua ta s-andreagâ aestâ mushatâ padi di Muscopoli, s-mutâ tu aestâ padi unâ hoarâ safi Armâneascâ iu Armânamea tsi s-adună adzâ aoa sâ-sh dukeascâ, kiro di unâ dzuuâ, arâzga.

Vahi multsâ di voi nu avets nica avdzâtâ câ aoa sh-tsintsi anji, tutu tu-nâ dzuuâ pisimâ, dzuua di Ayiu Dimitri, cu idyia vreari shi shteari câ himu unu populu, sutsati Armâneshtsâ ditu craturi ditu Balcanu iu bâneadzâ Armânjilji, bâgarâ thimeljlu a Consillui Armânjiloru / Makedonarmânjiloru.

Mutrindalui catandasea ti tora a Armânjiloru sh-lundalui tu isapi vrearea Armânjiloru di iutsido trâ avigljeara sh-acrishtearea a limbâljei Armâneascâ, dukimu câ easti ananghi di unâ ahtari institutsiuni cari s-adună Armânamea shi s-u-agiutâ sâ s-hârseascâ di tuti ndrepturli di cari s-hârseashti itsi altu populu tsi s-luyurseashti populu ahoryea, cu identitatea a lui ahoryea.

Trâ aesti ndrepturi, CMA chiola ahurhi ta s-dishcljidâ cãljiuri ti dialogu cu institutsiunli sh-autoritãtsli ditu craturi iu Armânjilji bâneadzâ cata cumu sh-cu institutsiunli evropeani. Scamnulu simbolicu trâ aestâ institutsiuni fu aleptu Muscopolea, locu di pirmithu sh-yisu, locu di isturii armâneascâ sh-evropeanâ, di culturâ shi simbolu di moarti sh-anyeari. Consillu Armânjiloru / Makedonarmânjiloru, vremu s-agiungâ unu cadru institutsiunalu salami, vârtosu, tsi mashî deadunu putemu sâ-lu crishtemu.

Câ tse mindui CMA s-andreagâ Muscopuli aestâ prota **Adunarea Atsea Mari a Armânjiloru** di iutsido? Minduimu s-andridzemu aestâ andamusî:

- **trâ itia** câ vremu s-yiurtusimu deadunu dzuua pisimâ di **Stâ-Mârii** – **avigljitoarea Armânamiljei** - tu aestu locu cari easti trâ noi, Armânjilji / Makedonarmânjilji, unu locu simbolicu, mplinu di toarili a tricutlui sh-di seamnili a yinitorlui;
- **trâ itia** câ Muscopuli, aleapta sh-avdzâta metropolâ a Balcanlui, fu thimiljuscitâ di Armânji sh-câ tu-aesti locuri cultura Armâneascâ bână deadunu cu tuti alanti culturi balcanitsi: gârtseascâ, arbinisheascâ, vâryâreascâ.

- **trâ itia** câ Muscopuli anyie prota oară tu Balcanu unu spiritu ahoryea, putemu s-dzâtsemu evropeanu, ashi cumu s-caftâ adzâ tu Evropa nauâ;
- **trâ itia** câ Armânjilji / Makedonarmânjilji voru sâ spunâ câ nica bâneadzâ, ca populu autohtonu, populu tsi-ari fitursitâ tu Makidunia Anticâ alu Filip sh-Alexandru.

Vremu sâ spunemu cu aestâ andamusi a Armânjiloru di iutsido câ Armânjilji suntu **UNU POPULU**, unâ mileti, cu idyia limbâ, adets, culturâ, a s-hibâ câ istoria nâ dispârtsâ di vârâ 100 di anji, fârâ s-nâ-ntreabâ.

Vremu sâ spunemu cu aestâ andamusi câ nu kirumu sh-câ nu vremu s-kiremu, vremu sâ spunemu sh-câ vini oara ca tuti craturli ditu Balcanu, tsi furâ adratî sh-cu sâdoari, sândzâ sh-pâradz di-a Armânjiloru, s-agiutâ aestâ vreari a noastâ, armânearea a noastâ tu banâ!

Unu populu armâni tu banâ atumtsea cându nica sh-azburashti limba. Vremu ca andamusea di adzâ s-hibâ unâ paradhigmâ trâ tuti andamusli armâneshtsâ tsi s-andregu anu di anu tu craturli ditu Balcanu.

Easti mari mârtii ca la unâ Andamusi Armâneascâ s-nu n-avdzâmu limba di dadâ, limba cu cari criscumu!

Vini oara ca limba Armâneascâ s-hibâ pricânâscutâ sh-agiutatâ sâ-shi intrâ tu aradâ: tu sculii, tu bâserits, tu mass-media – iutsido, tu tuti craturli ditu Balcanu iu Armânamea bâneadzâ!

Vini oara ca Balcanlu sâ spunâ câ easti **unu locu dealihea evropeanu**, câ spiritlu di bânari deadunu, vreari sh-acâkiseari a tutâloru miletsloru balcanitsi, spiritlu tsi lu-nyisa Riga Fereu (sh-elu Armânu!), easti adzâ tinjisitu.

Armânjilji furâ daima ligâtura, apuntea anamisa di etniei, furâ daima tinjisits bânâtori, lucrâtori, mări Mecena a craturiloru tu cari bâneadzâ.

Trâ tuti aesti hâri, prindi s-lâ si toarnâ adzâ cu unu singuru bunu: **Limba Armâneascâ s-hibâ luyursitâ parti di avearea culturalâ a Balcanlui.**

Vâ uoru s-tritsets unâ dzuuâ ti niagârsheri, unâ dzuuâ iu, de-adunu, s-amintâmu unâ cama ahândoasâ **dukeari Armâneascâ**. Adunats aoa, tu aestu mushatu locu di istorii Armâneascâ, anvârligheats di muntsâlji tsi liga Armânamea di Pindu, Gramosti, Epiru sh Thesalii, sh-cama alargu pri iu elji bâneadzâ adzâ, vremu s-nâ dukimu adzâ deadunu tu fuljeaua di iu s-asprândirâ kimati, kimati, aua sh-cama di dauâ suti di anji. Aoa, deadunu, vremu s-dukimu câ **Muscopulea va u-apridunâ diznâu Armânamea.**

Turnarea Muscopuli s-nâ hibâ ambaru!

tu 15-li di Agustu, 2010